

Ta asina ta tuma hende haci y piki pieu

Ayera mi a lesa di e "GUARDIA" di inicialnan J.C.S.R. naci na Venezuela, di 24 aña di edad kende lo a declara na agentenan cu recientemente el a wordo atraca bao di menaza cu cuchu, den baño di un establecimiento, y e sospechoso a kita 400 dollar di dje. Segun titulo di e noticia, "guardia a topa cara cara cu su atracador". E informe aki a resulta "conoci pa mi", y mes ora mi a bay den mi potoshi di papelnan.

Tur indicacion tabata, cu ta trata di Juan Carlos Stapleton Rodriguez, naci na Venezuela 23 di mei 1979, docente na universidad di Suecia, bisa na # Upslangatan, Stockholm, Suecia, di vacacion na Aruba kedando na Milenium Resort camber 414.

E Juan Carlos aki a wordo asalta y 400 dollar a wordo kita di dje na "Mambo Jambo" den baño, di parti di un presunto bendedor di droga.

E ta esun cu lo a para un auto di polis y cu polisnan lo no a haci caso di dje, y despues el a para un di dos auto di polis, kendenan si a haci un investigacion y no a mira e asaltador sospechoso.

Esaki ta e Juan Carlos Stapleton Rodriguez cu a bin na redaccion hunto cu taxista J.C. cu a declara di e sucedido y cu ta na caminda pa aeropuerto pa bolbe su pais pasobra e ta disgusta cu e trato cu el a haya di polis na Aruba.

Esun cu a bay na brigadier B. duna su denuncia y procesverbal a ser traha.

Ki mishi meneer Juan Carlos Stapleton Rodriguez, docente na universidad di Suecia, ta trahando como guardia na Aruba, un siman despues di a wordo asalta, mientras cu e dia despues cu el a wordo asalta e tabata bolbiendo su pais como un turista disgusta?

Aki tin trabao pa Warda Nos Costa, Recherche y polis pasobra e J.C.S.R. aki a coge tur hende un cabez abao.

Si e ta trahando ilegal na Aruba, su dunador di trabao lo haya e "tradicional multa"?

E multa cu nunca ta tende di dje, ni di e suma, ni number di e empresa menciona?

Of lo ta "pa casualidad" su documentacion ta den "proceso" pa haya "werkvergunning"?

ALGUN PIEU PA PIKI DEN CABEY

E prome pieu cu mi ta piki aki ta e observacion di prome ministro, cu lo bay haci investigacion riba integridad den aparato gubernamental. El a referi tambe riba e proyecto di ley cerca parlamento, pa loke ta trata integridad di partidonan politico y ta wardando riba comentario di cada partido y tambe riba financiamiento di cada partido.

Si ta bay haci investigacion riba integridad di aparato gubernamental, por spera di awor caba cu pa 2010 ainda esaki no ta cla, si esun di integridad di partidonan politico y financiamiento di partidonan politico mes tin mas di 5 aña "paraliza".

Lo ta mihor si prome ministro a bisa cu "ta investigando integridad den aparato gubernamental y tal y tal fecha esaki lo ta cla", e ora ey tur hende sa cu no ta wega di palabra so tin.

NOS CARCHI DI IDENTIDAD

Partido den gobernacion a haya un topico nobo pa usa durante campaña, y esey ta cu tur hende "a haya carchi di identidad nobo" prome cu eleccion.

Esaki a bira un topico politico caba, y mi tin cu bisa sinembargo cu mi ta di acuerdo cu sr. Mike Eman cu a muestra riba e "sacamento di placa" for di mi cartera pa yuda gobierno.

Tin keho constantemente diariamente tin riba e prijs di 40 florin cu mester paga pa e carchi, cu pagamento di potret acerca y cu bo fecha pa busca e carchi ta tal fecha, tal ora, tal lugar.

(No por saca un potret mas ningun caminda, awe ta tanto potret bo mester saca pa tal prijs).

Di repente e carchi a bira "oro".

Pa tal fecha, si bo tin 3 yiu di mas di 12 aña di edad, bo mester tin 75 florin pa saca potret, y 200 florin pa saca carchi.

Gobierno no a stipula cu bo por busca bo carchi tal caminda.

A stipula bo dia y ora tambe, sin tene cuenta si tur hende cu 3 yiu di mas di 12 aña tin 275 florin pa gasta den un tira pa "yuda caha di gobierno" y perhudica nan familia.

Si pone algun cent acerca, esaki ta casi 145 kipashi, den un tira, cu ta kita di familianan cu ta pasando den duro riba nos isla.

Nos gobernantenan y parlamentarianan por tira e placa aki afo kizas den un dia, pero 90 porciento di nos comunidad no por haci esaki, ni den 3 luna.

Di con no a haci nada pa handicapnan (cu no por sali di cas), pensionadonan, nos grandinan cu no pormove y no por sali di cas) esnan cu ta cobra onderstand cu e 40 florin pa "diamante" pa nan ? y di esakinan cu no por bay busca nan carchi ?

E campaña pa crea mas choller, mas criminal, mas limosnero riba nos isla ta tumando bon caminda. "sigui asina!"

BUSCANDO UN LIDER NOBO

Mi a sinta hari "chiki chiki chiki" ora mi a lesa e comentario di sr. Mike Eman cu AVP ta completamente habri pa mas hende participa como candidato pa lider di Partido.

E no a postula su mes, ta e partido a propone su candidatura na partijraad.

A ser publica cu Sra. Mary Wever a postula su mes como candidato, pero si e lo logra trece e cambio di mentalidad cu ta su deseo, mi ta duda.

Den nos mundo politico, nos no ta madura suficiente pa tuma e paso aki.

Si partijraad a postula Mike Eman, y el a acepta, no tin nada pa cambia pasobra e simpatisadonan ta bay cu nan partijraad y ningun otro candidato no por logra esaki, no den AVP den e añanan aki. Den otro partido esaki lo por traha, pero den AVP ?????

E stigma "Eman" ta mucho profundo riba e partido aki ainda.

HARI "CHIKI CHIKI CHIKI"

Otro cos cu ta ponemi hari "chiki chiki chiki" ta ora mi mira parlamentarianan ta manda nan lista cu preguntanan pa publicacion. Preguntanan cu nan ta dirigi na ministro via president di parlamento, conforme reglamento y stipulacionnan di orden di Staten.

Pa mi persona, e preguntanan ey ta "preguntanan fabrica pa politica wordo hunga" cu e topiconan.

Den seno di partido e preguntanan y nan contestanan ta conoci caba, pero mester busca un manera pa saca cierto informacion y cual ruta ta mas facil y safe cu e ruta di Staten?

Si ta di oposicion e preguntanan ta ser haci, bo sa cu oposicion berdaderamente kier sa kico ta pasando, pero ora ta di esnan den gobernacion, e duda ta keda existi. "Mester tin algo pa drecha un caminda!"

ULTRA-TELEFERICO ATROBE

E titulo ey mi a tuma di un locutor di noticia.

E mes un cu a papia di reunion sin Curom.

Atrobe ta tende di Status Ultra periferico, lazo cu Union Europeo etc. Ultimo dianan anochi di informacion di FESCA riba e mes topico.

Personalmente, mi ta fada di tende di Ultra periferico, di bishita na Madeira, di sinta na mesa cu president y parlamentarianan den exterior, di pasa vacacion na islanan Canaria, di "Koninkrijks en Europese verhoudingen", di delegacionnan cu ta biaha aki y aya etc.

Laga nos politiconan di tur partido, comercio, industria etc. sinta na mesa hunto, determina kico ta kico, y ora cu tin un consenso riba e asunto, e ora ey bay medionan y splica delaster palabra di henter e asunto y cu esaki ta e "ruta 2000".

E politiqueria di kende ta sinta mas halto den "teleferico" tin hende cansa caba.

Juby Naar



www.diarioaruba.com

The way business moves!

DIARIO
Online
E Matutino di Aruba